

दिनांक 31.10.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- लौहपुरुष सरदार वल्लभभाई पटेल ने वां री डोढ़ सौ वीं जयंती रे मौके आज सिरधाभाव सागे याद कर्या जा रह्या है—प्रधानमंत्री नरेन्द्र मोदी जनता ऊं एकजुट व्हे र देश री प्रगति सारु खुद ने समर्पित करण री अपील कीनीं
- राज्यपाल हरिभाऊ बागडे पैली वाळा फौजियां, वीरांगनावां अर वां रा पिरवार वाळां भला माथे खास ध्यान देवण बाबत् कह्यो
- राज्य सरकार बाढ़ अर भारी बारिश ऊं खराब व्ही सरकारी संपत्तियां री मरम्मत सारु 1 हजार करोड़ रुपया ऊं बत्ती रकम मंजूर कीनीं
- राजस्थान बस ऑपरेटर एसोसिएशन आज रात 12 बज्यां ऊं सगळी स्लीपर बसां बंद करण रो ऐलाण कीनीं

000

लौहपुरुष सरदार वल्लभभाई पटेल री डोढ़ सौ वीं जयंती रे मौके आज वां ने सिरधाभाव सागे याद कर्या जा रह्या है वे देश रा पहला उपप्रधानमंत्री अर गृहमंत्री ई हां ई मौके प्रधानमंत्री नरेन्द्र मोदी जनता ऊं एकजुट व्हे र देश री प्रगति सारु खुद ने समर्पित करण री अपील कीनीं वे आज सरदार पटेल री जयंती रे मौके गुजरात मांय केवड़िया रा एकता नगर मांय राख्यी ज्या राष्ट्रीय एकता दिवस समारोह मांय बोल रह्या हां

.....
ई मौके जयपुर मांय ई एकता मार्च निकाली ज्यो इण मांय मुख्यमंत्री भजन लाल शर्मा नौजवानां ऊं देश रा भला अर ऐका ने सब ऊं ऊंचो मानण री अपील कीनीं मुख्यमंत्री कह्यो के सरदार पटेल रियासतां ने एक कर र मजबूत देश बणायो अर अब नौजवानां ने खुद रे पाण ऊबो भारत बणावणो तैय कीनो हैं वे कह्यो के लारला दो साल मांय नौजवानां ने 91 हजार ऊं बत्ती सरकारी नौकरियां दीरीजी अर डोढ़ लाख ऊं बत्ता ओहदां माथे भर्ती रो काम चाल रह्यो हैं मुख्यमंत्री गांधी सर्किल ऊं अमर जवान ज्योति ताई करीब 3 किलोमीटर पैदल मार्च ई कीनीं प्रदेश रा न्यारा—न्यारा जिला मांय एकता दौड़ राख्यी ज्यी, ज्यां मांय मोटी तादाद मांय लोग भाग लीनीं केन्द्रीय संचार ब्यूरो कोटा री ओर ऊं बूंदी शहर मांय लगायी ज्यी दो दिन री मल्टीमीडिया प्रदर्शनी ई आज पूरी व्ही

000

देश आज पैली वाळी प्रधानमंत्री इंदिरा गांधी ने वां री बरसी रे मौके सिरधाभाव सागे याद कर रह्यो हैं कांग्रेस संसदीय दल री अध्यक्ष सोनिया गांधी, लोकसभा मांय विपक्ष रा नेता राहुल गांधी अर पार्टी रा दूजा नेता नई दिल्ली मांय इंदिरा गांधी री समाधि शक्ति स्थल माथे जा र वां ने श्रद्धांजलि दीनीं कांग्रेस अध्यक्ष मल्लिकार्जुन खड़गे ई इन्दिरा गांधी ने सोशल मीडिया पोस्ट रे जरिये याद करता थकां कह्यो के वे देश री सेवा करता थकां प्राण निछावर कर दीनां इन्दिरा गाँधी री बरसी रे मौके आज जयपुर मांय प्रदेश कांग्रेस मुख्यालय माथे सर्वधर्म प्रार्थना सभा अर पुष्पांजलि कार्यक्रम राख्यी ज्यो इण मांय प्रदेश कांग्रेस अध्यक्ष गोविन्द सिंह डोटसरा समेत केई नेता अर आमजन शामिल व्हां

000

प्रधानमंत्री नरेन्द्र मोदी कह्यो है के आर्य समाज ऐंडो संगठन है जो बिना डर भारतीयता री बात करे हैं वे आज नई दिल्ली मांय राख्यी ज्या अन्तर्राष्ट्रीय आर्य महासम्मेलन मांय बोल रह्या हां श्री मोदी कह्यो के लाला लाजपत राय सरीखा केई स्वतंत्रता सेनानी आर्य समाज ऊं सीख ले र खुद ने देश री आजादी री लड़ाई सारू समर्पित कर दीनां

.....

000

राज्यपाल हरिभाऊ बागडे पैली वाळी फौजियां सारू जयपुर मांय वृद्धाश्रम अर जोधपुर मांय एकीकृत परिसर, बलिदानी फौजियां रा नाम माथे स्कूलां अर सार्वजनिक ठोडां रा नाम राखण री नीति ने मंजूरी दे दीनी हैं ई सागे ई राजगढ़ मांय सैनिक कल्याण कार्यालय खोलण री मंजूरी ई दीरीजी हैं राज्यपाल आज राज्य सैनिक कल्याण बोर्ड री मीटिंग मांय बोल रह्या हां राज्यपाल पैली वाळा फौजियां अर वां रा पिरवार वाळां रा भला री योजनावां रा ऑटोमेशन सारू 'सैनिक वेलफेयर पोर्टल' अर 'सोशल मीडिया प्लेटफॉर्म' री ई सुरूआत कीनीं

000

जैसलमेर अर गुजरात ऊं लागती भारत-पाक अंतर्राष्ट्रीय सीमा रा हलका मांय देश री सेना रा तीन ई अंगां रो भेळो महा अभ्यास त्रिशूल चाल रह्यो हैं नौसेना परिचालन महानिदेशक वाइस एडमिरल ए.एन. प्रमोद नई दिल्ली मांय खबरनवीसां ने आ जाणकारी दीनीं वे बतायो के 13 नवम्बर तांई चालण वाळा ई युद्ध अभ्यास मांय फौज री दक्षिणी कमान, नौसेना री पश्चिमी कमान, वायु सेना री दक्षिण-पश्चिम कमान अर तट रक्षक बल, सीमा सुरक्षा बल अर दूजी केन्द्रीय एजेंसियां शामिल व्हे रही हैं अभ्यास मांय नौसेना रा 20-25 युद्ध पोत अर वायु सेना रा 40 लड़ाकू जहाज ई शामिल हैं वाइस एडमिरल प्रमोद कह्यो के ई अभ्यास रो मकसद समुद्री अर दूजा रक्षा बलां बीचे तालमेल बधावणो हैं ई मौके नौसेना उपप्रमुख वाइस एडमिरल संजय वात्स्यायन कह्यो के ऑपरेशन सिंदूर बंद नी व्ह्यो हैं वे कह्यो के भारतीय नौसेना हिन्द महासागर हलका मांय दाखिल व्हेवण वाळा चीन रा हर पोत माथे नजर बणायोडी हैं

वाइस एडमिरल वात्स्यायन बतायो के अमरीका अर रूस विशाखापत्तनम मांय आवता साल फरवरी महीना मांय व्हेवण वाळा अन्तर्राष्ट्रीय बेडा निरीक्षण अर नौसेना अभ्यास मिलन मांय शामिल व्हेवण री हामी भर दीनी हैं

000

राज्य सरकार बाढ़ अर भारी बारिश रे कारण नुकसाण झेल चुकी सरकारी संपत्तियां री मरम्मत सारू 1 हजार करोड़ रुपया ऊं बत्ती रकम मंजूर कीनी हैं ई रकम ऊं प्रदेश रा 41 जिलां मांय 14 हजार ऊं बत्ती सड़कां सुधारी जावेलां ई सागे ई 7 हजार 900 आंगनबाड़ी भवनां री ई मरम्मत करी जावेलां शिक्षा विभाग री परिसंपत्तियां री मरम्मत सारू 487 करोड़ रुपया मंजूर करी ज्या हैं जयपुर जिला मांय ई सारू 60 करोड़ रुपया ऊं बत्ती रकम खर्च करण री मंजूरी मिली हैं

000

बारां जिला री अंता विधानसभा सीट माथे व्हेवण वाळा उपचुनाव सारू प्रचार जोर पकड़बा लाग्यो हैं भारतीय जनता पार्टी रा प्रदेश अध्यक्ष मदन राठौड़ पार्टी रा उम्मीदवार री हिमायत मांय दो दिन तांई प्रचार करेलां

000

कृषि मंत्री डॉ. किरोड़ी लाल मीणा अहलकारां ने खाद री कालाबाजारी, जमाखोरी अर नकली खाद री बिक्री माथे आंकस लगावण रा हुकम दीनां वे आज प्रधानमंत्री फसल बीमा योजना रा तैत कर्या जा रह्या काम रो जायजो लेवण सारू राख्यी ज्यी मीटिंग मांय बोल रह्या हां डॉ. मीणा राज्य मांय डीएपी अर यूरिया खाद जरूरी तादाद मांय मौजूद है, पण इण री कालाबाजारी रोकण सारू अहलकारां ऊं सरहदी जिलां मांय चेकपोस्ट बणावण रा हुकम ई दीनां मंत्री बीमा कंपनी रा अहलकारां ने साखां रा बीमा री रकम रा चुकारा ऊं जुड़ी समस्यावां रा बेगा निपटारा सारू ई कह्यो वे बतायो के मौजूदा राज मांय हाल तांई साखां रा बीमा रे पेटे 6 हजार 206 करोड़ रुपया दिया जा चुक्या हैं

000

राजस्थान बस ऑपरेटर एसोसिएशन परिवहन विभाग कानी ऊं करी जा रही सख्ती रे खिलाफ आज रात 12 बज्यां ऊं प्रदेश मांय चालण वाळी सगळी स्लीपर बसां बंद करण रो ऐलाण कीनो हैं इण ऊं प्रदेश रा न्यारा-न्यारा शहरां अर दिल्ली, गुजरात, महाराष्ट्र, उत्तरप्रदेश, हरियाणा अर मध्यप्रदेश बीचे चालण वाळी करीब 8 हजार बसां बंद व्हे जावेलं

एसोसिएशन रा अध्यक्ष सत्यनारायण साहू आकाशवाणी ने बतायो के जोधपुर, भीलवाड़ा अर उदयपुर समेत कोई ठोडां ऊं काल रात ऊं ई स्लीपर बसां री आवण-जावण बंद व्हे गयी ही, जदके जयपुर अर कोटा समेत न्यारा-न्यारा शहरां मांय आज रात ऊं स्लीपर बसां रा मालिक हड़ताल करेलां

.....

दूजी कानी परिवहन विभाग रे मुजब मुसाफिरां री हिफाजत ऊं जुड़या नियमां री पालना नी करण वाळा बस मालिकां रे खिलाफ कार्रवाई चालती रेहवेलं महकमा रा अतिरिक्त आयुक्त ओ पी बुनकर कह्यो के मोटरगाड़ियां री आवण-जावण ऊं जुड़या नियमां री पालना जरूरी है अर मुसाफिरां री हिफाजत ऊं खिलवाड़ नी कर्यो जा सके हैं

000

रणथम्भौर राष्ट्रीय उद्यान मांय सैर करण सारु बुकिंग बाबत् ऑनलाइन सिस्टम ने वन विभाग पूरी तरह डिजिटल बना दीनो हैं नुवा सिस्टम रा तैत सैलाणियां ने टिकट सारु बुकिंग करावण बाबत् लेण मांय लागण री ज़रूरत नी हैं सैलाणी घर बैट्यां ही मोबाइल फोन ऊं बुकिंग कर सकेलां

.....

000

राज्य रा न्यारा-न्यारा संभाग मुख्यालयां अर राजधानी जयपुर मांय 24 नवंबर ऊं 5 दिसंबर तांई **‘खेलो इंडिया यूनिवर्सिटी गेम्स-2025’** व्हेलां खेल विभाग रा शासन सचिव डॉ. नीरज के. पवन बतायो के प्रदेश मांय पहली बार व्हे रह्या आं खेलां मांय देशभर रा करीब 200 विश्वविद्यालयां रा 4 हजार ऊं बत्ता खिलाड़ी 21 खेलां री होड़ां मांय शामिल व्हेलां वे बतायो के जयपुर मांय 11 खेलां री होड़ां राख्यी जावेलं

000